

Vēltēs

Krēta lapā geltuonē ē rodē, ē joudē.
Vies ožsēsiotēs jau šalti ožoudē,
Tompē debesis ēr ē krūvas kruovē,
Nakti lītos viel griuovius ēšpluovē.

Kronkē varna ēr žvērblīus ēšbaidē,
Stērnas pamišķie po lonkas laigē.
Komelātis komelē datompē,
Poikos rodou vēsus aplonkē.

Vies notēla po geruos adīnas
Suodnē ēškratēs paskotēnēs slīvas.
Saulēs spindolē pu medius braidē,
Jorginu keporēs patvuoriūs graibē.

Sobēra vuobolā ē šlapē žuolē
Ka laimē parēs, nieks ēr negalvuojē
Prisieda dailē ont senuojē slēnkstē
Ruoduos omžiu krīžiokou nuor viel nosēlēnktē.

Pritūpusi gielies lapās nokluojē,
Kažkou rokava, kažkou žēgnuojē.
Aksuomēnēs garbanas ont petiū krēta
Tēp medo kvepiejē ka dongos prašvēta.

Nuaugusi dailē lēg kronta lēipelē
Rauduonom lūpuom sošēldē šerdelē.
Šermokšnē ouguom ašaras bīriejē
Baltuoji balondē vēršūnie topiejē.

Šēlkēnēs plunksnelēs aplinkou pabēra
Vo beržos ož tēlta ēš meilēs sostēra.
Geltuonom šakeliem noleidēs galvelē
Primargēna lapu, soskaitē opelē.

Ēr kruovē balondē lopus ont taka
Kol ēštēisē lēipa medo kvepontē šaka.
Ēš džiaugsma berža lapā mirgiejē
Vuo rodou tēk juokies, tepē ēr reikiejē.

Po pažastē lietsargi roda pabraukēs
Ont tēlta sostuojēs da kažkuo laukē.
Baltuoji balondē ēlgā veiziejē,
A tēkra anodo vēns kēta mīliejē.

Beržielis lēipelē tēk gluostē ēr glaudē
Baltuoji balondē noskrēda palaukiem.
Pakrontēs pražīda pavasari lēipuom.
Vuo beržos viel laukē ka medo solēitom.